



煙霞萬古樓文集

二





煙霞萬古樓文集

(二)

王曇撰

王雲五主編
叢書集成初編
煙霞萬古樓文集
二 册

中華民國二十四年十二月初版

撰 者 王 曇

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

鎮

煙霞萬古樓文集卷五

爲吳江紳士呈請故贈光祿寺卿浙江按察使司前鞏秦階兵備道王翠庭公遵新例於本縣建昭忠祠狀

竊死有五節。獨疆場之餘勞爲足書。祀有七名。惟祐主之無歸爲足卹。故祠官經典以能死勤事者入昭忠。郡縣章程以別建專祀者著令。甲紳士某等。援周官旁招堂贈之禮。引鄉社族厲鬼歸之法。有故贈光祿寺卿浙江按察司前鞏秦階兵備。賜進士出身。兵部車駕司主事。王某。籌軍。獠道。裘革隴西。一葉身輕。皇上已予之葬。而予之祭。九層天大聖恩。復贈以廕。而贈以卿。努力酬知。竭誠奉職。制詞之龍光也。見危授命。臨難捐軀。溫綸之敷錫也。其嗣子某。捧壺書而泣血。淚盡眶枯。其嗣孫某。承懿詔以受官。天遙地重。是何敢於窮泉雨露之外。再乞馨香。幽光日月之中。復求毛血。獨是熊光哭墓。少尺地以廬其子孫。韓弇死邊。無一葦以藏其匣主。不崇社祭。則纓公之餒何歸。不立叢祠。則桐鄉之魂無託。某等是敢粗具見聞。略撫行實。丐恩節府待命臺司。初光祿承上命備兵鞏昌也。洮以外雷公飛燕之妖。秦以內牛角羝根之賊。光祿疑以傳車走六百里書。而一駝負三十日食。則不若舍張綱單輅。就杜周一馬。掛不疑樞劍。脫暴勝繡衣。直覘賊壁。殺門。竟揖將軍。灞上。大府松公筠。署光祿爲徽成軍需總事。於時也。民有梓山把土之

勤官無蕪稅穀租之供。茹陂七處。咸慮攻瑕。倅馬什羣。皆來就草。鞏昌之守。或以爲軍興費大。疑鄧隲之在涼州。地險山多。恐鄭莊之遠千里。光祿乃告大府。省糧臺。啓元戎。撤調割。故其守岷洮二城也。樞乾。暨豆。盡爲軍儲。魚膏草苜。皆資戰備。甘境之賊。爲藍線。白線。慄竄無定。光祿以爲不編魚陣。則蓋勳莫殲。羌人。但寫孝經。則宋臬豈辦隴賊。遂乃求臨淄之弩兵。募煎靡之勇將。火矢五十爲排。馬士一千成隊。擿匿人於舫中。計殺賊於功簿。檄三郡二十一縣。得民兵八千餘人。凡一切解仇交質之豪。弛刑應募之衆。倉頭廬兒之厮。白虎揚威之校。莫不出魏尙私錢。以買犒牛。設虞詡三科。而賞壯士。光祿又遠修斥堠。內壁堅營。木樵漸壘之堡。中周虎落之樓。尺籍伍符之書。蘭石渠答之器。不半月。中成二千所。兩當之戰。賊帥張漢潮由鳳縣攔入。光祿衷甲抽戈。囊韃負鉞。如馬融之假部號。犇命西羌。似文聘之隊一軍。親當石梵。或賊去三舍。或虜來十步。或持重如韓安。或力戰如張羽。賊又偵伺糧臺。窺覲成縣。率烏合二萬。圍城門三日。光祿偃旂臥鼓。示之活門。拔旆投衡。蹙之死地。及賊之疑。則又潛出環槍。捷被慶甲。斷田疇。平岡之磳。署國淵首級之簿。當此之日。擊長離而諸羌散。邀枹罕而涼州平者。以光祿八千鄉勇爲長城也。秦階地連川陝。大營五六處。官兵十餘萬。流寇所竄。追軍所屯。時或賊壘居內。官營處外。光祿乃明脩流馬。暗餉陳倉。冒程昱之膽。送鍾會之馬。蜀中方一日而十驚。峻軍乃十道爲一部。知公武者。謂王脩必冒難而來。笑公文者。謂孔融乃成軍而出。光祿有募士王元佐者。西和鄉貢生也。生能挾鞞。死猶鑿足。實南八之

男兒爲史慈之名士。死之日曰：我從張睢陽乎。無負嚴將軍也。識者謂子桑知人。白季舉士。無以過此。嘉慶某年。軍功上計。皇上命爲浙江按察。光祿自以未殲餘醜。必靖羌涼。且大府以慶忌爲爪牙官。恐湟中有重腿疾。乃遮劉勳以安部曲。留杜畿以鎮河東。光祿於是繕平涼州邑之壁。置流民棲宿之所。給牛犁籽種之資。脩掩骼埋齒之政。或疑于禁鬚蒼。葛公食少。則光祿已於五年二月伏羌觀病。然猶覆頭柏孝。負大盾而習勞。擁膝高柔。抱文書而臥看。伏枕之日。口占朱博檄文。夜問賁麗星象。直至七亡七死之時。猶操九拒九攻之算。到十舉十危之地。尙畫三沮三仞之謀。及自知不起。人說彌留。始乃召丞椽爲先令。書呼長子爲鑿檀語也。巢門有烏。雖張珩自知死期。夕陽在亭。豈楊震竟無歸魄。况乎豫州百姓。尙爲陳實圖形。焉有梓里九親。不見倉慈畫像。今其嗣子通判某。寄居吳江本族。名爲士著。實則寓公。抱胡公之祭器。俎豆無家。載木主之先君。衣冠無廟。伏蒙皇上賜有恩卹銀兩。尙留公庫。未緝私囊。可否馳牋上臺。下牒本縣。卽君父貨死之金錢。爲臣子藏衣之夾室。卽叔敖期思之首邱。爲石相棲神之泊宅。乞於吳江縣境。擇地一區。置王光祿專祠一所。以神主附升昭忠祠。忠臣忽祀。魂則在羌湟水中。大招若來。鬼不死。玉門關外。

虎邱建白太傅祠堂狀

伏考禮祭之法。以能捍苗患爲功勞。郡國之典。亦得索鬼神而祭祀。以故陸雲去縣。浚儀之俗祀其神。石

慶相齊。卽墨之民配諸社。或以報功。或以示本。承而勿替矣。吳郡鳧鴈爲鄉。舊稱澤國。初時也。范蠡闢長洲之濱。地尙龜宮。子胥叱潮水之潮。人雖魚府。洎至黃歇城吳。水分四縱。韓臬布地。波奠三江。所由禁社。蔓連叢祠。屋接五花樓下。盡刻高公水政之文。四絕碑中。大書禹鑿了溪之事。固已祀法粗穢。祭儀略備已。獨是香山一瓣。空題刺史橋名。粉水千年。未立江州祠廟。如唐太傅白文公之刺史是邦也。太湖五宿。有三年去郡之詩。武阜兩壕。開七里橫波之路。散龍口而築濤門。灑彪池而通斗戶。常使長干靚女。盪花市以川游。大隄行人。泛酒城而水戲。設不塞海眼以金錢。賂波神以玉璧。焉知不地尙陸沈。山仍海湧也。嘗考昌黎訟旱。有懲呵風伯之文。表聖愁霖。有痛斥雨師之檄。是明神有吐食之嗟。功德歸馨香之薦歟。公身尙讜言。史明直道。論河東入相。豈容褻越平章。斥于頔佞人。不許曲歸天子。且復奪中官兵柄。謂承瓘不可監軍。竦天下忠臣。謂奉國宜假節度。至今讀虞人之戒。字字忠言。當年詠新井之篇。人人忌口。夫豈但年尊九老人。重鷄林祭倉頡爲文神。鑄閻仙爲詩佛也已哉。按祭神二義。王充主于報功。祀事十名。許慎兼以會福。公八灘手鑿。六井重甃。想當日虎山立碣。水號流桑。鶴市蒸隄。洲名種荻。水功紀在五湖。宦澤流諸三柳。豈可使白蛇廟壁。弗題魯峻碑陰。黃水祠門。不建李剛石室。今虎邱東麓。有五賢祠者。但陳豆俎。不述勤勞。亂列衣冠。無關祭法。且復西門靈館。法字欵頽。晉川涼堂。神宮墜場。若非郎官水上。另書李白文章。太傅湖邊。別塑謝安神像。是何異沉碑峴首。棄羊祜於荒阡。作廟羅池。屏宗元於瘴海。卑府

等擬於塋影舊園。建白刺史祠堂一所。髣司馬遷夏陽覽古。再列桓楹。視卜子夏嶠谷棲遲。重安杵臼。庶幾樂陵墟館。記府君往日遊神。瓠子金隄。志子貢舊時工築。燎牲磔犬。有歲常豐。面郭臨岡。無堂不固。伏懇綿田桂樹。榮書介子之祠。木主石龕。永拜北君之廟。除申藩臬。伏乞施行。

上達香圃尙書乞改名良士狀

竊惟烈士殉名。君子疾沒。是以顧雍佳士。慕中郎之才而借名。鄧艾農人。讀太邱之碑而改字。名以立義。孤而不更。古之制也。曩待罪公車。計偕選部。又數年矣。雲間日下。恥士龍鳴鶴之再來。四海彌天。悲鑿齒道安之又至。司馬公兒童皆識。愧其相才。韓伯休婦女皆知。焉能賣藥。語曰。避名名追。逃名名隨。非黃瓊之名難副。抑樊英之名太盛乎。前者浩然牀下。累王維之一呼。賈誼小生。誤吳公之謬薦。於時服虔改姓。畏師門崔烈之春秋。鄭元亡名。懼帳下馬融之禮樂。曩聞宋庠避讒。以郊爲嫌。趙岐逃難。以嘉爲諱。茲之呈改舊名者。非傅燮之慕南容。實劉備之畏北海。大部憐葛靚之義。問自字仲思何居。愛嘉貞之才。恐他日中書誤報。是猶欲鄭君以籍名求官。希楊朱以死名潤骨也。呼劉胡而止啼。聞花卿而已瘡。大部何望乎。狀元之必中。老夫進士之不諱。晉肅哉。或者劉向更生。辛文不死。峴山再刻。鴈塋重題。識狐篤之爲馬。忠。知范雎之爲張祿。去戈則爲柳渾。加日則爲程昱。安知滕曼恭之卽非曾子。黃叔度之不爲顏淵乎。慕樂天者黃。慕李白者碧。如曩者力學髫年。墜名中歲。變范蠡以陶朱。豈忘功名。改董蠻以仲舒。自傷今昔。

伏惟大部俯准稽奚聽從疎束庶幾易杜牧之名白駒皎皎仍唐風之字良士瞿瞿呼華陽貞逸山中知有隱居稱糞土愚臣朝廷識爲方朔謹狀

重脩潮海寺啓

朝梧啓伏惟法華一雨是地皆霑毗首千堂無金不布能以一瓶瀉大海之瀾卽以甘露起梵王之國是在法王大力無容咒鉢呼龍而在越士檀施敢不髹金報佛阜城縣潮海寺者始唐貞觀之初越宋政和之末因法運爲廢興隨世輪而毀立方一吹而成世訖卽變五而化劫灰至於今也蓋已古矣寺爲齊右夷庚燕南使候利竿初倒在乾隆癸丑之年彌勒當來逢司寇玉公之至因決獄而賦東山乃芟舍而留南國時也飯王宮裏正讀神農求雨之書防風國中忽來大禹騎龍之駕民方磔犬而弗靈公乃斬龍而不拜爰是默禱天神靜惟佛力繞牀一匝十地雄雷彈指三聲八天大雨遂使老人舞國不殺巫尪元女下天得收妖魅人謂使君隨車之雨公謂仁王護國之霖是冬大司寇胡公亦銜主上之命往察東人之獄入瓦官破寺讀靖康殘碑方停車而住初地亦秣馬而弔諸天目觀宿桑迦釋土面風吹獻花文殊泥容露立慨楞伽化作荒山陀兜率鞠爲漏澤遂欲以羯磨大斧重脩戰勝之堂且思以舍利餘灰再起忉利之墟某士民長官佛天弟子旣分符於一郡又受命於兩公始擬以五十九年之秋爲萬八千功德之始而其時毒龍作孽瓠于生波蕩鹿苑於尼河沉鷄山於香海幾使鷓鴣佛土祇留大海一漚帝釋天人

盡證水光三昧。此給孤長老。分金布地之遲。優閻賢王。慕佛雕檀之晚者也。今歲玉燭萬年。人安俗乂。金剛四位。雨順風調。某念前誓因緣。感諸方護力。爲大司寇。立頭陀之碣。地利當興。爲少司寇。作喜雨之亭。佛恩當報。是用工召魯輸。匠呼宋墨。爲法華造此世界。與楞嚴改作講堂。敢布同官集腋。咸分大力與瓢。務使母陀手臂。衆舉而造天宮。勿口須彌鼓椎。獨拳而打大地。是序大凡。乃爲小引。善財五十三參之拜。佛佛書名。蛟龍七十二座之碑。人人署號。

煙霞萬古樓結集自序

太元之草成。而劉歆欲覆醬瓿。三都之賦出。而士衡欲蓋酒甕。同是時也。桓譚以爲絕倫。張華爲之紙貴。豈文無定體。嗜痂者有異癖。嬖眇者多一目歟。李百藥曰。文章者性情之風標。神明之律呂也。張融自序曰。吾文章之體。多爲世人所驚。又曰。文豈有常體。丈夫何至因循寄人籬下。裴子野論文曰。人皆成於手。吾獨成於心。北齊祖瑩亦語人曰。文章須自出機杼。成一家風骨。何能共人生活哉。讀劉勰之雕龍。不如通擊虞之流別。讀鍾嶸之詩品。不如追韓嬰之傳說。見其委海若天吳。見其原岷觴積石。統四千年之文。爲一文觀。合四千年之詩。爲一詩釋。而古今詩與文之正變。洞然胸中矣。法律一新。如曹參守蕭何之文。旌旗一變。如光弼將子儀之軍。非謂師涓奏樂。必造新聲。徐摛作文。不拘舊體也。或曰。延年隘薄。靈運空疎。爲之奈何。曰。此不盡讀天下之書與詩文。而漫然操觚之謂也。漢郭憲。王嘉。全構虛辭。孟堅所以致讖。

張華爲之絕倒。抱朴子所謂懷空抱虛。有似蜀人葫蘆之喻乎。南史氏曰。文章容易通峭難。又曰。文章不
 斌媚。正如疥駱駝。今世之勉力宏詞者。班馬奇字。白孔陳羹。華林類苑。疊韻雙聲。驟焉而蘇綽大誥。忽然
 而王莽金滕。著淵通以擬道德。仿太元而作測靈。以艱深文其淺陋。以奇險幸其功名。揚雄以爲曉曉之
 學。繡其鞶帨。而目之爲翰林主人者。非也。亦有好事焉者。鑄賈島而拜。像東坡而祀。蜜膏飲杜少陵之灰。
 遍體刺白香山之字。老兵之貌。中郎優孟之學。期思高冠大履。而自居某一家之詩。與文者悖矣。氣水也。
 言浮物也。袁先生曰。重而能行。乘萬斛舟。重而不行。猴騎土牛。水浮而物之浮者。大小畢浮。不然。而任昉。
 沈約結其集。魏收邢邵爲之偷。斯文之末流也。鼻馬頰牛之論。中軍聽之而生爭。搗齏噉杵之談。洗馬思
 之而成病。則又斯文之魔業。翰墨之魘境。至若宏通碩彥。經師大儒。鄭元之文。通人不取。溫公之筆。四六
 不能。此不可以辭章律之者。其經濟大也。樂旨潘詞。廣談虞筆。二千年以下兼而有之者。緊何難哉。予髫
 幼成文。中年萬里。經史爛於胸中。雲山亂於脚底。自以爲才學識皆當有也。乃志功名。急經濟。遭臺官之
 禍。纂述之成書者。經史之論辨者。樂府之未諧宮商。金石之未付雕鐫者。吳中郡縣官持抱以去。而擊仲
 治半世之文書蕩然矣。並非關通丁謂之書。而概與一燒。亦不借重洪喬之寄。而投之江底。此砥柱之沉
 災。榮宮之火洗。當時也。郭子橫之救火。任文公之逃水。何暇計及著與撰之存焉否耶。幸而王陽燹道。險
 路求生。韓愈華山。危途獲濟。或藏之般浩手巾。或寄之王恭如意。主人莊子。僅留漁父殘篇。中書孝經。惟

剩王混摘句。抑不啻嵩山蝟斗之文。顯節陵中之蠹也。已竊惟彥章死豹。名以皮留。楚國神龜。生以骨貴。而乃陸澄著述。力已倦於經年。任昉屬辭。才將盡於晚歲。五行志少。尙可暗抄。三篋書亡。多難默背。憶當日十吏環書。五題盆集。門庭籓溷。盡是賦才。戶牖門牆。無非刀筆。沈慮而王充爲之氣衰。苦思而桓譚爲之感疾。見楊汝士蘭亭金谷。元白無詩。聞孟浩然疎雨微雲。中書罷唱。議禮經則白虎堂中。講論語則金華殿上。何其壯也。無谷子雲之筆。而空有樂令之口。無揚子雲之才。而徒有光庭之手。開頃刻之花。造逡巡之酒。斯文之道。有急就章乎。蘇明允之詩。祇有廿篇。杜子美之賦。不過十首。片羽苟重其吉光。千金可享其敝帚。僕今年四十五歲矣。前不遇古。後不遇今。死不見峴首沈碑。英雄墮淚。生不見阿難結集。活佛傷心。李旭曰。文章之事。不足傳於後世。蕭恭亦曰。千秋而後。亦復誰能傳此。嗚乎。未爲僧父。已笑衙官。纔讀離騷。便稱名士。劉季緒才非一世。偏能誹毀文章。徐孝穆一代傳人。未嘗譏訶作者。留達生廿四首丈人之集。娛我餘年。傳枚臯數十篇。必不可讀之文。自傷嫫媿。哀我文者。亦庶幾聽我言而恕我狂也。

代華頂百五十茅庵乞米啓

爲天台湧泉庵女土陳妙圓作

竊以德財竝濟。顯布施之六門。濃食兼資。譯比邱之二義。泥連河六年行道。亦須牧女調糜。奈羅城五衆安禪。誰化道人送食。天台者。東旦之鷲峯。華頂者。南瞻之鹿苑也。獨是地隣奧壤。竝無分衛之家。宅接幽區。絕少行檀之主。無非窮子。萬二千法侶之多。盡是化城。百五十茅庵之衆。雖其炊砂作飯。道性能堅。煮

石爲羹。色身難住。羅云法大。食一菜而猶羸。迦釋功高。咽一麻而必瘦。道中五漏。凡軀三禪。聖業。放開頭角。託居士而譚元。墮落鬚眉。現女人而說法。山中歲月。只勤妮子針功。道外風情。誰識□陵米價。邇者。法糧同匱。香積同空。羅喉供衆。呵道輩爲夷齊。彌勒投齋。笑仙山爲陳蔡。甚者。律明四分。無過午之頭陀。衣具七條。多呼庚之衲子。鬻魚聲裏。坐成有漏之因。飯版時中。行誤□□之果。道中嚼湯誦咒。時逢餓虎聽經。洗盃聞鐘。日見飢猿習□。所望梵天托鉢。假佛子之神通。米汁流船。借樹神之法力。仁□起信。誰非金粟如來。善士生心。卽是好施太子。三旬九食。大千僧應。荷人緣。七日一炊。五百伴誰非佛果。宗風不墜。無過困睡飢餐。佛法無多。祇此穿衣喫飯。天台寺裏。今朝鑿破砂鍋。華頂峯頭。明日踏翻碓臼。

天台國清寺建五百羅漢堂啓

原夫真性無形。無一形而不現。法身無像。無一像而不呈。張八教之網。度法無邊。立五行之門。度機無量。誘凡夫於天界。覩金色者發心。憩小聖於化城。見灰身者起信。駕航濟險。雖四魔習定。亦成勇猛之軍。乘炬通幽。卽六賊歸真。亦入大王之路。阿羅漢者。十聖之始階。三賢之初磴也。宋太宗時。曾敕造天台山羅漢尊像五百一十六軀。肇於雍熙之年。奉于壽昌之日。儀形古矣。志載存焉。當時也。鑄義眉百里之鐘。度天下名童者十七萬衆。建釋迦舍利之塔。脩龍門石佛者萬七千身。旣而乾明院土木之雄。尊尊有號。淨慈寺金銅之盛。像像有名。蓋不嘆學士之手題。隘以十六。夫豈徒懷安之廣塑。多逾八百者耶。耀冶。愚荷

智超迷蒙悟度。力同蝸斧。住七祖之宗門。功類蚊梯。守九師之教寺。大悲有眼。弘誓無肩。希聖賢出處。卽應身以體眞身。感龍象興衰。卽化相以參眞相。前者琳宮陔場。賴青衣護灑神多。紺宇虺隤。藉鴻福圓成人衆。鎔金髹漆。廿五有顯已光明。團土雕檀。八十好儼然完備。於時曇花亭下。再覩山神造寺之年。玉女峯前。重觀彌勒赴齋之日。去年先師遺教。指道場隙地爲壇。今春法衆興心。延口劫諸賢爲會。影隨形現。登中峯者見文殊萬衆而來。響以音生。陟曹山者感梵侶飛行而至。斧羣山之一木。百棟可成。畚衆土之一坏。千尊可就。廓莊嚴之境。功德如林。集歡喜之緣。慈悲如地。唯是庀功非易。冀萬善爲因。依鳩力唯艱。仰一心爲成就。儻或解囊藏事。何殊貢水歸瀛。如其輸篋程功。奚啻驅星助月。刻日材聘嵩華。匠追楊鄴。麗窮圖繪。爰新鹿苑之規。妙絕剗鑄。宛備鷄山之概。所爲穿山度石。仿童子之南求。帶水拖泥。效常啼之東請。半千年一作。寧愁手足蒼騰。五萬拜不辭。豈惜鬚眉墮落。今啓貴官尊士。結人天一會之因。賢宿仁人。脩福慧雙清之果。望脩羅戰勝堂成。殊非婆達施眸。倘昆首相檀像就。誰謂豐干饒舌。

舒鐵雲姨丈瓶水齋詩集序

沈李昌谷於溷神之中。寄劉公幹於鬼伯之口。微之未死。託遺稿於香山。荀攸臨終。交阿鷲於鍾會。良士自大梁來揚。而吾姨丈人之集。成於眞州。昔宋考功毒希夷而有其佳句。齊邱子沈譚峭而有其化書。若巴樸園觀察之敦命劂工。與刊傳作。何遜卒而王僧孺集其文。崔湜死而裴耀卿纂其集。爲千古尙也。我

姨丈人位才備八廚。身行萬里。於粵則愛鐵雲之山。於黔則樂飛雲之洞。故其詩千巖競秀。萬怪惶惑。趙雲慈八十而願以詩師。梁山舟九十而見其書拜。其實錄也。王筠見沈約。不謂遲暮逢君。劉頌見張華。豈信人間有此。蓋讀書數倍於前輩。宜積薪居上於後來。嘉慶二年。偕我備兵。叔馳驛軍營。值齊王氏火燒朱鎮而西時也。師漏多魚。翁驚失馬。入黔貴則南籠方圍。馳楚壁而襄樊正急。間道則經烟塵六十四路而遙。遇敵則會相州九節度師而戰。湖督汪文僖新假我叔氏勝軍三千。以田悅之親家。分猗盧之餘卒。與先生一鞭一筆。九拒九攻。纔及貴境。而雲南土練藤甲諸軍。悉隸麾下。婦人作賊。馬援之所能平。女子從軍。李廣之所不將。而時所部女官土司龍囊仙者。馬上桃花。木蘭火伴。寵以妹喜之男冠。假之敖曹之鼓蓋。壁其軍於水倒流山也。斬龍仙則惟擁二矛。禽史歸而僅馳七騎。從先生之計。又更舊將以易夷兵。變徽章而改番服。不旬月間。而女賊王囊仙致於麾下。興義之戰。以李典步騎八百。破吐番寧州三萬。力追銀鼓。生擒鬼章。論功者謂督部灰囊火馬之功。實本道輸攻墨守之奇也。南籠圍解。我叔氏以前官左降。復介君於湖楚軍營者五載。急攻則氈下濃書。緩戰而圍城作賦。杜暹州紙豈止百番。謝公庫篋殆將九萬。房元齡軍書之奏。駐馬皆成。令狐楚白刃之中。揮毫不輟。大府初以君奏留黔中。而介推逃賞。魯連辭功。賦櫻桃爲林甫微辭。軍中作水山曲。咏蜀道與嚴公寓意。要其賦性蕭閒。秉心引退。示不願爲桓冲參軍。故託意作郝隆蠻語也。叔氏嘗語予曰。吾貴州之行。洩斬叛苗一百餘萬。雖韓愈行軍不逢裴度。而令狐辟幕實

得劉蕢。蓋謂先生鄒枚之亞也。八年癸亥。與良士結鄰吳中。何蕭兩雋之巷。張陸交讓之濱。既無宏景層樓。誰與戴公築室。重陽風雨。日日催租。淞水蒹蘆。年年負米。長洲宋汝和觀察爲同人刻今雨集也。屬良士刪鄭集之鷓鴣。屏謝詩之蝴蝶。選取雄章。多將百首。其盛氣如孔文舉。其博識如劉子駿。其貫串如鄧道元水經注。其磊落如司馬大人游獵賦。緊是時也。趙擘第論其詩細。蔡邕已傳於京師。愛君者焚宮中媚香。不識君者亦薔薇浣讀。香山誦一首而女子價高。康樂出一篇而洛陽紙貴。無以逾矣。古之工爲詩者。或一卷擢第。或一聯入相。或一詩得黃門。一詩得郎侍。如先生者。李泌蓬萊之閣。王珪金炬之蓮。國之光也。而乃楊徽警句未登御屏。公權法書不題殿壁。生無花樹之居。死乏西華之里。嗚呼。命歟。性樂楷隸。工李主錯刀。法永公門限。穿羽陽宮瓦。寫老嫗扇頭。其與人書也。綠盆糊麪。豈惟百函。青泥封書。每馳萬里。弄陳遵尺牘爲榮。得劉宏手書爲悅。若良士之不嗜裝潢者。亦復衣藏索靖之書。帶祕鍾繇之札。孔文舉謂舉篇見字。欣然獨笑。蔡中郎謂筆迹當面。相見無期。能無慟哉。精音律。工三絃。亦習弄笙笛。彈琵琶。則鸚鵡立聽。奏羯鼓而羣羊躑躅。十四年己巳。與太倉畢子筠華珍流寓京國。作伶元通德。吳剛脩月數十餘。陶微服聽酒樓之原闕。

唐陶山觀察傳疑錄徵事啓

國語證經。民謠著史。自公羊定傳聞之例。漆園發寓言之凡。信以傳信。擇其尤雅。疑則傳疑。見於他說是

以韓非述事務乎兩存。鄒衍談天。驗之小物。灑神人之墨汁。道德五千。駕使者之黃車。輜軒九百。皆有補於教化。實足資乎簡編。昔裴松注三國。盡輯異聞。景文作唐書。兼收小說。使汲冢不藏紀年。二代幾無正朔。康成不探讖緯。五帝幾無名號。况乎神怪未明。桓子將欺以獲狗。浮夸必斥。劉氏且昧夫豢龍。是知傳疑者。傳信之肴蒸。傳信者。亦傳疑之炙穀也。且夫天道好遠。風霆顯其至教。人心不死。冰雪表其精誠。匹夫匹婦。愚而神。一動一言。衷諸道。閭史之所未載。鄉老之所樂稱。若無徐廣。劉向之長篇。王粲。戴逵之短部。將名湮於談藪。事闕於語林。抑亦有道仁人之所深惜歟。庖丁輪扁。柳梓韓圻。五行方技之流。二氏因果之諦。名物象數。鳥獸蟲魚。見智見仁。可歌可泣。卞壺整衿以爲禮法之文。王衍揮塵以爲清談之助。郢書燕說。誤亦可思。笑牒言鯖。婉而善入。則譎趣勝於莊語。讜論寓於廋辭矣。至若伶元。據通德微辭。白帝拾神童遺事。乞嫖姚太乙之精。求后土人部之夫。未免房幃勸褻。卷牘誨淫。文不雅馴。搢紳先生之所難言也。蒙也足蹇。九垓心賦。八索筆墨。僻於嗜奇。文章耽於寓託。聆琅邪釋郢之精。悟顓頊讀鬻之繆。賦蟬則文無二千。徵貓亦事少七十。苟非揚子雲之鉛槧在懷。左太冲之門藩皆設。安能效匡鼎之解頤。隨野王之著脚。此傳疑一書之所由作也。是書也。類無取乎區分。文勿嫌於累牘。義主遏惡而揚善。辭貴微顯而闡幽。不傷名教。則滑稽之雄也。不惑異端。則機鋒之妙也。不及時政。則野曝之獻原闕。

煙霞萬古樓文集卷六

祭光祿大夫素香公文

元戎麗極。仙源輝玉牒之圖。華嶽崩雲。天漢泣銀潢之冑。國以宗老爲尊。天必假耆臣以壽。蓋長口口泰
壹之神。不死者國皇之宿。乃勿令綠圖益算於軒庭。紫府乞齡於義宙。國喪雄陶。人思風后。豈佑其後者
能昌。介其躬者弗厚。仙闔難排。靈穹莫敏。如吾素香光祿府君之棄。吾制府長公季昆而逝也。一則班超
萬里軍中。讀馬服之書。一則黃霸三年江表。手鳳陽之計。毀容侍娶。含贈匪親。纏髮承衾。桐棺莫附。蓋河
溼遠而岷岵悲。淮泗歸而蓼莪賦。竟使孝王伯仲。慟闕禮於飾終。百藥壙篋。爲奔喪而徒步。用是青芻縮
醴。寮侶摧膺。白馬流蘇。寅官孺慕者也。公博賚鹽梅。皋颺肱股。懷平當之經濟。學出天人。資郤穀以詩書。
才兼文武。世紀伐於功宗。身起家於民部。薛生兩鳳。翊家國之羽儀。荀毓雙龍。惠熙朝之霖雨。是非后軒
夢駑。驅羊出牧。伯之才。抑猶趙夙。夙生衰。愛日煦江南之樹。繫公啓宇。手種三槐。郎伯巡方。天承八柱。越稽
我長君。制府長公之撫我江南也。碧幢紅旆。初開幕府於臨安。鐵鉞瑯戈。遂築節樓於吳會。人歌杜母。羨
斂胥蠲。民頌倪寬。羸逋不督。察蟲盤覆地之冤。洗蟻穴黃沙之獄。秉墨吏于蠹炎。屏諱官以鷹逐。陶侃之
恭勤軍府。檢束豪民。劉宏之都督荊州。威行南服。於時中官錦彩。善政時旌。天子璽書。慰勞最篤。而又黃

龍望府。次君有飲水之清。紫馬來南。太守有貨船之譽。初官司馬。江東兩杜之名。繼駕朱幡。鳳水三刀之署。使郵亭皆畜雞。□□幹吏俱爛文句。此非般家世學。盡受訓於劉翁。公綽門風。定躬陶于孔鑄者耶。皇上以元齡屏誠。贈公光祿之勳。章賢籛金。晉賤元成之爵。方喜福時令子。永承鯉訓。中庭堯叟賢昆。長侍阿翁東閣。而公則福天遊幻。纔蒔少海之桑。壽宇迟遲。竟聘遼東之鶴。神鴻歸去。天上行春。赤鯉飛來。人間無藥。嗚呼痛哉。和衷江戒。有元方父事之尊。參佐淮南。受萬石官聯之教。認楊公石馬。常年隴草增悲。望彥先琴牀。今日徽絃永悼。蕪辭遠酌。思題都尉之碑。絮酒空醜。敬奠平原之廟。靈駕風來。神顏電笑。尚饗。

督撫公祭督部大學士公孫文靖文

嗚呼。靈穹勿圯。倚斗弼之有九星。巨鼇不傾。藉坤輿之有八柱。以故樞陳元律。七聖佑天。世馭蒼牙。五期佐命。設若斷盤皇之手臂。必無兩嶽同崩。卽或壞帝座之藩門。豈有三台並暗。況壽中黃以翊寶鼎。元輔長生。老彭祖以相放勳。大臣弗死。豈有星逢復旦。再奪三公。日際重輪。三薨上將。謂中朝多翼弼。則未必玉帝少股肱。且天上有文昌。又何必向人間借將相也。越我督部大學士公孫公。以七月某日薨於來鳳時也。苗民犬孽。軍已焚其牙旗。米賊妖人。部又褫其紙傘。天子坐金牀。以望太歲。夜有捷書。三軍祭白石。而召彭巫。鬼猶畏藥。乃繼福郡王祁山之計。一國皆驚。距和伯督沔水之喪。前軍先哭。天喪元臣。何其革

也。或謂公宵趨上邽。倍道兼程。夕救樊城。事繁食少。而又南封銅鼓。飲伏波之毒流。西祭金人。食疏勒之井水。以致偏枯病禹。大荒之神尤無靈。甘草醫龍。伊尹之煎方不救。七萃譎虞。五軍郊弔。緊可痛也。蓋公忠以相國義以督師。前此黎侯失德。阮疆徂侵。雕庫告國難於前。申胥乞濟師於後。說公者謂君如好鶴。臣敢盜弓。訟是元咍。國猶肥鼓。公以仲尼沐浴。荀息鼓鐘。自當收充國金城。徙夷人銅柱。將見一征自葛。三戶亡秦。國斥癸辛。屯開戊己。直可使百蠻土牒。全歸天府輿圖。六詔交閭。盡拜將軍畫像。此五單于分國之日。天厭南荒。亦兩克汗並立之時。利居中國。而公則木罌緩渡。繩棧徐趨。圍項三重。退原一舍。明許其壺漿。簞食以迎。默聽其棄甲曳兵而走。蓋以爲殺相柳而三仞三沮。無若服孟獲以七禽七縱。故其師陳富良江也。爲子之竊燕而伐。則匡章可以無功。爲季孫逐君而來。則乾侯可以勿戰。此由念彼苞桑。傷其破竹者也。洎乎羿弓射日。共頭觸天。太公以蒼兕覆船。長鬣以餘皇誤敵。公猶斧開馬足。軍出龍頭。以桓侯據橋之聲。止晉帥爭舟之血。宵且濟也。整以暇矣。如謂軍籜衷甲。荆舒肆欺。梨樹奸盟。吐蕃賣詐。公豈不知危攻束馬。險出飛狐。斷長蛇兩頭。塞狡兔三窟。祇以爲聖人不殺之心。王者無外之意。但宜魚水其君臣。不可鯨鯢其土地。是爪士全師以伏殺。膚公分謗於破斧者。堂堂乎仁且義也。於時降城旣築。老鳳初飛。以桓公北伐之軍。充寇恂還朝之騎。以馬援南征之檄。應溫嶠內召之書。國以李牧爲長城。帝用張蒼爲計相。方知唐廷燕許。便是將星。舜殿夔龍。亦勝弓甲。公復曳姬公赤鳥。活安石蒼生。務使呼韓頓

穎。知貳師爲近臣。回紇來朝。識汾陽爲內相。所以樞庭樂奏。無非夔吼鵬爭。祕省文章。亦是三宮五意。蓋行父之頭未禿。而荆公之鬢已蝨也。未幾中書出鎮。節度巡方。領陶侃之八州。奏姚崇之十事。尉陀國裏。旌節花開。日月宮邊。阿衡船到。人以爲田千秋之相度。李光弼之軍聲歟。至若官轉六曹。身遊九寺。出托克爲行省中書。屈太白以翰林供奉。君恩則前後公銜。故事則子孫男爵。此史氏敘官詞林佳話。公之相業不繁此也。至於躬毆狡獪。手掃欃槍。皇上以廓爾喀不靖。命福郡王移師西藏也。時則婆羅門族。黃教三千。帝釋國中。魔兵十萬。帝謂梵天兜率。豈容調達刀聲。佛土耆闍。不許天神劍響。而不謂鐵圍三戰。鬼母皆飛。法螺一吹。金剛盡甲。王乃咒韋陀之杵。折波旬之戈。公又屣屨羸糧。馬牛運木。護火具以狼機。通雪山以狗站。驛名籌筆。馬借馱經。聚米如山。飛芻入國。公之輸輓抑又勞也。旣而章皐鎮蜀。人言諸葛後身。嚴武守川。地是公孫舊國。而其日黃巾白狄。苗龍之支黨潛來。赤髀橫囊。槃瓠之子孫又反。我以爲令如蠶尾。楚人是何多也。彼以爲地是犬牙。漢兵其如予何。公乃掀翻大海。沃潑流螢。全抽董澤之蒲。勦殺萑苻之盜。而無若荆巫狗吠。楚鬼狐鳴。持白挺而作妖民。探黑丸而殺武吏。方將分元女兵符。收蚩尤魔陣。乃赤眉之族未殲。而白雞之年已讖矣。嗚呼痛哉。河湟未靜。休璟先亡。安西未甯。代公又沒。公不念大庭滅膳。南內撤懸。與其風山紫府。天上神仙。孰若力牧山稽。太平宰相。某等官聯江左。手版淮南。奠尙父以玉璜。祭巫咸以金鼎。欲書亥字。碑已藏峴首之陽。要望午橋。神亦葬畢原之上。用申盎酒。祇酌緹觥。爲

將軍作諭蜀之檄。靈馬風來。與丞相作詛楚之文。雲車電下。

爲河督徐心如宮保祭沈慕堂治中文

嗚呼。襄雞潰絮。奠南州之酒者。千里之交也。白馬牽旒。迎庚公之喪者。黃河之阻也。而況兒寬爲經術出身之吏。羊綏是國家可惜之人乎。嘉慶十年四月。天子嘉趙廣漢之聰明。使以南路廳分知畿輔。以張京兆之儒雅。又以治中官擢佐黃圖。方將收豺狼避道之最。枹鼓希鳴之薦。賜黃霸以丈車。拜韓稜以楚劍。而乃輦轂三年。膏肓一臥。褒馮勤爲佳吏。未下璽書。望蔡茂爲中台。空成禾夢。受俸纔留一月。攀車已哭。五倫如我。慕堂京兆治中之卒於官也。公察舉本郡孝廉。充武英殿繪圖官六年。凡一切玉衡。金度。國章。泰壹。圖書之祕。風鼓。孤虛。鐘律。刑德。奇胲之式。蚩尤。封胡。鳩治。地典。容區之圖。星經。日晷。宮室。職方。形勝之器。靡不手規。黍尺。目睇。燿蠹。輸盤不能名其工。輅璞不能究其博。以乾隆五十一年。欽定四庫書。議敘之日。命以左右輔。令長官署用。公遐慕潁川四長之名。中牟三異之績。手焚遜清德頌。讀傅氏治縣譜。歷雞澤。唐山。肥鄉。安平。蠡令。於時韓延壽。鐘鼓管絃之治。恩信遍廿四縣。袁邵公噫。嗚流涕之聲。獄罪出四百家矣。而贈公捐館。賢宰宅憂。陶士行居廬弔鶴。阮嗣宗泣血蒸豚。無以喻其毀也。憂滿。又歷宰饒陽。臺城。爲大名長垣令。懲西門豹。請璽納璽之拙。任巫馬期。星出星入之勞。二年之中。辭宣幾欲換縣。馮魴呼爲健令。嘉慶元年。總督梁公上最狀。以公爲卓公寬中。劉陶錯節也。今上褒公治行。畿南百縣。張旣爲三

輔第一。日上諸城。呂乂以一州居首。以三年某月。應三刀之夢。遇采薪之憂。病全赴部。聖上以關中地重。非良吏不能成咒虎威。直督以畿甸才難。非賢者不能保繭絲障。大府表刺涿州。所謂八鎮開關。九州大濶也。改保定安州長選。深州直隸州事。漢法以六條察千石。州牧爲尊。陸彭以一歲歷三州。車朱最曜。公風屬吏行春。警村民置鼓。郭伋去帝城不遠。蒙福京師。張亮作山頭好夢。絲掛幽州。趙郡之鹿不偷。綏山之桃常熟。或持鎌刈草。而宿郵亭。或課果樹榆。於訓村落。來則耨聲用水。去則胡牀掛柱。公之愛。召翁卿似之。公之察。襲渤海遜之也。京兆王畿千里。以同知分四路。猶郡國專十道。南路城接天垣。地連瀛鄭。賣刀劍買牛犢者爲良民。棄鉏鉤持兵弩者爲奸宄。是以南塘舫下。逐捕爲難。冀州郡中。豪強善梗。公肅清蹕路。游擢治中。方高柔擁膝之時。正汲黯病多之日。德林之級未徙。張威之笏已還。以十五年四月卒於雄縣。嗚呼。鄭子產國人含珠。盲史傷心。公孫宏經儒治才。漢書循吏。公四子孟季以孝廉明經授令長校官。叔仲以河隄水工爲郡丞縣宰。胡威父子皆是清官。石奮一家居然萬石。豈非隱侯門閥。雲卿文章。代有傳人。替手乎。公治類桐鄉。慶流石相。吳公爲治平第一。所去民思。田叔爲天下長者。乃令君死。某裏湖列宅。與沈慶之閉里通親。韋放徐州。與張吳郡昏姻篤舊。方期吳興印渚。他年歸話司州。東陽長山。今日已無支遁。孫興公猷川築室。空賦遂初。顧長康一鼻長風。無從寄淚。敬遣某官。順過任城。代躬驛奠。一盃椒醕。臨風望顧。榮琴牀。幾瓣心香。何處哭王濛塵尾。尙饜。

爲河督徐心如宮保祭戴恭人文

夫有博平新野之德者。宜饗以鄉君萬歲之封。有宣文修成之賢者。宜報以趙母赤烏之壽。此史氏豔稱乎萬石君之教家。曹大姑之能誠子婦也。重九後之數日。恭人之訃書。倅來淮浦。時也。季君玉年以邱嫂功喪。方館甥貳室。夢中指痛。許止之藥未嘗。遊子衣單。溫嶠之裾欲絕。括髮奔喪。禮也。恭人爲今治中刑部員外郎前滇黔兩省州刺史芋園先生德配。故廣州司馬石蘭公冢媳。訓導戴雪溪公長女也。受經伏勝。侍戴公之中庸。治禮曲臺。傳章姑之論語。續史則巾幗談遷。弄筆而女中燕許。凡一切龍輔女紅之書。劉休鼎味之錄。陳媛獻椒。辛姬頌鞠。罔不佩容。臭於雞鳴。承揮樞於夜燭。結褵之始。外用王舅在堂。內則君姑在室。興門五世。男角女羈。食指千名。奴耕婢織。李平陽高明賢女。每事皆諮。鍾夫人帷裏簡婚。無姻不擇。憲部公以名進士。歷官內外也。雲司畫日之筆。治中京兆之眉。三刀雲北。一州水西。凡韓母中興之賦。皆蕭恭德政之碑也。丈夫之子六人。季女之尸三索。漢武帝元光初詔。三兄各舉孝廉。唐高祖武德開科。一弟先成進士。寶家五桂。添郝詵之一枝。荀氏八龍。少朗陵之二子。嗣君等或乖厓治蜀。一縣神明。或震澤分符。三吳大治。九天咳玉。榮堦步於璫篋。一帖泥金。耀宮袍於娣姒。而恭人方三錫三加。一驚一喜也。喜則花磚弄影。小郎之乞假將歸。懼則竈突吹風。冢婦之災占不已。蓋洞庭之書方至。而恭人之疴已不起矣。當時也。巫山滄海。元微哭婦之詩。蠶薄機絲。王肅傷妻之淚。王夫人鄰門宅相。九十何衰。魯姆師

宗國女儀。百齡以外。憲部公將衰潘髻。忽傷王維寡居。乍鼓莊盆。不作樊英再拜。天何奪我。恭人以古稀之歲耶。恭人期孫六人。女如之。曾孫二人。女亦如之。長君官銜在祿秩之令。姓名登茂陵之書。幼者或緣帷受易。吞卦聰明。或擁樹弄書。之無識字。李夫人之八篇典式。不傳女而傳男。華孟姬之輜駟安車。比抱孫於抱子。豈第京陵當日。人仰慈雲。東海當年。獨留孝水也已哉。某學愛子將。才憐士行。有左思嬌女之情。少張禹愛男之性。季君之讀書賓幕也。安陵樓上。丈母見憐。金谷園中。姊夫最勝。袁豹怪其書多。樂廣知其玉潤。方以爲選堦窗開。泰山峯近。豈意蒙喪錦被。元方計聞。泣血蒸豚。嗣宗歸省。翳可痛也。夫甘泉畫像。朝廷翟菲之光也。子舍白頭。士大夫私家之事也。某家寄淮南。地睽吳會。六龍同食。喜荀陳兩姓之方昌。五鳳齊飛。慨軾轍三人之未第。方擬恭人以師氏媿媿之年。王母蟠蟠之几。何圖九龍母死。五時衣空。萬歲山高。一星婺墜。傾箱倒屣。待謝家親戚之濃。篋筥包苴。唁許允山中之淚。遙申椒酒。代榛栗於威姑。敬獻蕪辭。補闕文於君氏。徐惠辭章。唐六典誰修女憲之官書。班昭文字。漢春秋宜入夫人之石誌。嗚呼。尙饗。

爲戶部侍郎總管內務府大臣桂香東芳及己未同年官九十六人公祭史太恭人文

嗚呼。讀瀧岡之表。勸母儀者一代文章。讀碧落之碑。哀母教者一門四子。匪桓少君鹿車甕汲。焉能相鮑。宣爲名臣。匪義成君紫綬文軒。焉能訓崔駟若師氏。我年母太恭人之叔季嗣君。某等己未同年進士也。

其初燕山五寶。舉孝廉者一叔而四昆。其後雁墦十年。成進士者同科而兩甲。雖堂開四柱。護庭悲一鶴之飛。而家本五良。令母喜三龍之躍。先年以宜人章服。晉封太恭人也。五花金字。卽長君鳳閣文章。百緣告身。卽季子螭坳手筆。甫也工部。爲太夫人吟慈竹之詩。遜也揚州。有何水部看梅花之開。我諸同年以歲時上壽也。擬以八十上郡君之板。九十介蘭英之酒。登堂呼魯肅以兄。上殿掖馮勤之母。乃石建之四子白頭。因居子舍。而王濬之三刀夢益。一塵出守也。季君守蜀郡之明年。陶母居京。潘輿弗駕。官中書者。以蘭臺祕省爲家居。官工曹者。以補闕拾遺爲林下。舍人俸薄。借潤筆以甘旨。水衡錢多。比參苓於米價。太恭人方嬉花園以宜春。抱佛經而坐夏。豈意三周小滿。還朝之五馬未歸。五月中天。無恙之慈雲忽化。耶。太恭人執婦道六十年。風庭抱樹。代夫子而臥冰。麻粥兩盂。乳小郎而夢抱。蓋別駕不爽爲王祥之孝。撫叔不失爲昌黎之嫂也。初年丈蓀裳公通守南康。三年熱釜。寧留孟光舂聲。一輛柴車。不入王良官舍。太恭人之意以爲冷官滋味。不妨借鼎噉鼈。海樣王城。不若隱人高價。嘉慶元年。公膺兩宮引年之典。受于謹延年之杖。時也。房中之樂。盡是壽人。夢裏之鈴。無非才子。七孫八壻。章姑周禮之書。百拜三加。子姓冠婚之禮。其闈門福德。孰有甚於此者。嗚呼。八子爲二千石之官。一時未必。三品受女賢人之號。百歲何難。太恭人豈不見夷鼓方雷。一門氏族。封胡羯末。羣從芝蘭。讀廿四首達生丈人之集。齊眉畢竟。手四十章西歸遺教之經。人淚闌干。文曰。

燈纂能榮。鬯華不萎。仁人事母。百年乃慰。若佛涅槃。若仙脫蟬。慈母安矣。孝子憾焉。月惟重午。其日則晦。熒惑在心。是時熒惑守心者一月。日中方彗。三沐三薰。灑潘請贖。反席未安。若坐假寐。恭人先期。召名畫師。曰予事佛。寫三歸依。曰予受經。具四威儀。童顏鶴髮。圖成而嬉。飾終之物。恭人手儲。瘞錢十萬。鑿楹而書。漆棺壽藏。含殮所需。明衣明器。治於閒居。不欠一錢。麻姑升仙。不磨一針。大士生天。南康之喪。居以九年。琴書一寢。行像長懸。俞氏史氏。初爲朱陳。漢法交互。相爲昏姻。內兄弟。出入庚庚。謂甥謂舅。我舅我甥。以是兩姓。弟兄發發。季狸季豹。伯達伯适。八廚八及。四黃四括。進士者四。孝廉者八。兩氏各以姑表爲昏。各生四子。鄉舉者八人。成進士者各二人。同科同甲。金昆玉友。一樹之凋。三珠之秀。苟令中書。何郎水部。兩車入朝。五馬出守。昔事南康。不入官舍。臥冰哭竹。王祥別駕。乳姑者有。乳叔者寡。恭人之孝。名聞天下。上自廟祭。下迄童婢。三鼎五鼎。手自滌器。鼠耗米耗。三千不許。恭人之仁。如雨雨地。延壽有杯。長生有枕。飛龜不藥。畫龍無病。手遺教經。入華嚴定。鴻範五福。繫母則聖。亥字疑年。七十而五。凡我同年。登堂拜母。絳帷聽經。一朝弗覩。讀大家箴。悲中興賦。恭人之堂。名曰四桂。恭人之封。鄉曰萬歲。張說父碑。鍾會母誄。一門之中。文章諸貴。絳州刻石。甘泉畫像。列以班昭。傳之劉向。靈草一株。胡香四兩。絮酒椒馨。哀哉尙饗。

查梅舫大廷尉八十壽序

某聞威械弛而俎豆布。鈞鑽絕而九刑厝。若廬都內之獄不興。而后廷尉得以斷天下之平。孔稚圭曰。從

古名流皆有法學。故釋之定國者。頤漢朝。元常文惠。久壽魏闕也。嘉慶十八年四月朔日。梅舫大廷尉八十攬揆。九卿六曹大夫。爲公奏壽人之樂。翁覃溪學士以下。祝嘏而介詩者。如干人。而屬序於良士曰。昔荀爽百日而司空。賈誼一歲而大中。僕年八十始爲廷尉。子毋祝我以殷阿衡。周鬻熊。張蒼。夏侯勝。胡廣。公孫宏。亦毋祝我以龐公。戊子之大小。晉公甲辰之雌雄。使僕如羅結之百二十而長秋。王祥之九十四而三公。一門襁褓。百笏儀同。堯年蝙蝠。果老侍中。勿虛爲我譽也。予之康強而耆艾者。予知之矣。予濱州再刺。蜀縣再尹。守粵西者兩郡。臬黔贛者兩省。常鎮觀察。楚南轉運。中歷金川兵事。安南軍政。僕稍有武功不足稱也。然予之康強而耆艾者。予知之乎。予始宰縣也。蜀之宕渠。今爲南江。橋名黃金。地曰柏陽。灌木百十里。古柏萬萬章。盤古不名。其枝柯之壽。豎亥不測。其道里之長。孔明不踞。爲廟。漢武不取。爲梁。幼者柏精。老者柏皇。在混沌不鑿之天地。有萬古不覩之太陽。時無莠民。乃有好商。開山匪大禹。墾草匪商鞅。將庇焉而縱壽斧。亦毅然而思啓疆。山虞貨金錢。匠木刊州章。予投牒而籲大府曰。人三爲衆。獸三爲羣。十年樹木。百年樹人。五丁欺蜀牛之糞。大鐘給由之君。商與民爭利。夷與民爭地。人非奢香。驛非龍場。徒令者商君之木。構兵者處女之桑。黃龍清酒。罰必雙。深山大澤。禍所藏。利市百倍。必生否臧。斧斤一入。必有死傷。惡木不廕。嘉樹無忘。曷若斷鐵山之直道。樹禁碑於桐陽。寧絕地利。毋破天荒。至今五十年。無干我判也。子知之乎。枯松有太保之名。大樹爲將軍之徵。老七松爲處士。壽五柳爲先生。樹有音聲。木

有神靈。某喟然曰。此公之所爲康強而耆艾也。某又聞之矣。槩疏地力。揉耒剡耜。神農氏之治也。鑄刃范金。避臭去毒。燧人氏之始也。昔鄭國溉澤鹵。而秦成奧區。李冰開稻田。而蜀稱陸海。公不嘗開巴山之老林乎。檄楚民二千戶。墾萊田三萬頃。使九真知火種者任延。俾廬江知牛耕者王景。棗祇之屯田。許下。張飛不用於閬中。鄧艾之手執耒耨。葛亮未行於南鄭。蓋后稷之稼穡而神。伊尹以區田而聖。某聞巴州通江之間。大寧竹山之內。終南漢陰之際。各有老林。皆千餘里焉。使大吏行公之法。以清秦楚蜀之山溝。則材木梯蔽於漢江。以驅秦楚蜀之耕牛。則粟米積高於庾廩。統萬古之龍荒。合三省爲一井。苗民何所蟄其穴。山賊何所竄其脛。公之德倍彭錢而八百之未有艾也。公觀察淮南。某從公遊。時蜀賊縱橫西鄉。鄰水間。公方吟焦山之鼎。咏橋亭之硯。譚潤州之誌。收漢人之篆。率更千字之碑。寶晉百家之翰。江淮草木。張萬福之威名。甲士金山。陳少游之水戰。客方借箸而談。公不拊髀而歎。某以爲八公文字。乃在淮南。四皓功名。不如絳灌。宋制。大理官不置吏。士大夫手掌文書。防吏奸也。公筆惟畫日三尺之法。不搖。案卽如山。一牘之手弗假。不使召公勞而爲方伯者。朝廷所以禮耆賢也。必使臯陶暗而爲大理者。朝廷所以慎肆赦也。張湯持法精。天子用何比干而平。周興治獄峻。天子用徐有功而慎。此今日大理所由覈尙書之成要乎。某聞之。伯機有支離之叟。法潛有蒼髯之友。宏景以種松而仙。張騫以石榴而壽。東平之柏西靡。摩頂之松東首。白公有檜。歐公有柳。成都之桑不多。龍陽之柑最久。外黃柏樹之數。虞延知之。大別千年。

之柏。神禹植之。某今而知楷模所以百世。周孔所以長生也。夫福一日之名位者。不若爭百世之利。立一時之事功者。不若壽一方之命。是以草宅病於周書。均田美於夏正。桓寬所謂寶路開。子思所謂寶藏與。古云埋金九里。不若開得意之田。置身九卿。不若官一縣之令。蕭何作相。以請佃上林爲奇功。貢禹彈冠。以請佃宜春爲善政。若汜勝有九穀之書。而不墾一弓之地。賈總有齊民之術。而不開一廩之畷。此老農之月令。非縣官之治譜也。山海經云。西南黑水之間。廣都之野。爰有膏穀。冬夏播琴。爲公千萬年。南江德政碑可也。中丞銅鼓堂詩遍天下矣。公換羽移宮。拋鉞擲線。叔源之步不隨。明遠之色一變。詩如于卷。落花依草。邱中書之風流。舞雪迴風。范衛軍之婉轉。廉頗今日。方上馬而如飛。馬援他年。且據鞍而顧盼。歲癸酉春暮。花農通守自南海旋京。云廷尉生辰。京師鉅公爲詩。乞君爲序。余曰。某爲文喜紀實事。平生無讓詞。遲日走見廷尉。曰。我平生政事無當意者。少年宰南江。柏陽之柏。廣袤百十餘里。禁商民之奸。黷監司立鐵案。封其山。至今遵之。活大柏億萬萬焉。時蜀未被兵。恐伏葬有先見也。又嘗開巴山之老林。深巖密箐。萬古不耕。予召湖楚民一千三百戶。伐叢灌。芟荆棘。墾沃田二萬三千餘頃。刀耕火種。數十年熟矣。因書南江紀事詩。暨黃金橋古柏行。曰。此一題目也。爲予序之。某曰。此功高大禹。德茂后稷矣。某聞川楚之間。曰。城口。圍城有未開老林千餘里焉。終南之南。漢陰之北。并柴關。鳳嶺而東。老林亦千餘里焉。合大小巴山之老林千數百里。凡三省四千餘里。皆禹貢梁州之域也。華陽黑水爲梁州。

黑水在今留壩廳之內。想大禹刊木益焚山澤時。皆在此處。此四千里之梁州。更世亂而再成洪荒者也。廷尉創開老林。始此一縣。所謂非常之原。黎民所懼。人情味安。難於盧始。此事功之足傳千古者。故序之以請於後。此之節鉞三省者。踵公法而行之。庶幾乎弭百世山民之亂。而衣食此四千里之人民也。并記於此文之後。

屠孟昭大尹尊甫蘭渚封君七十封安人宏農君五十八歲壽序

漢崇上巳。晉紀重陽。春秋命歷之序。魯侯燕喜之章。古今士之傳世而不朽者。曰儒林。文林。曰賢良。循良。疑年在亥四月。維夏廿有三日。爲封君屠蘭渚先生七十攬揆。封安人宏農君設悅舉觴。則孟昭太史宰古真州之第六年也。初先生年六十。浙中士大夫爲孟昭介。於通德之里第。鴻章鉅製。班書范史。而先生之德始彰。先生直亮方正。朱絲繩也。溫良精潤。玉界尺也。儉年稼穡。寒年織績。豐年玉也。讀萬卷書。行萬里路。天下才也。梓其壽之文十餘篇。景鸞經涉七州。李固周觀天下。序者謂先生豪。販吳漢於漁陽。贅百里於秦市。逢萌擲盾而不役。傅介棄觚而不事。序者謂先生介。一日歸歟。手計然之書。取白圭之棄。序者謂先生善處貧。樓護過齊而合宗族。折像厚藏而施親疎。序者謂先生善處富。顧凱手植嘉樹。而憲之果爲吏部。王祐身種庭槐。而且也。眞爲三公。序者謂先生述邈而後通。艱難而後順。爲先生食其福也。若者序先生之遇之奇。而不序先生之志其遠而志其大也。功莫難於傳世。人莫難於知子。陳寔生紀。而知

其爲興宗之人。索靖生緣。而知其爲宗廟之器。夷簡宰相才。祖禹天下士。皆門以內知之。不先之以丁覽者。必不成子賤之堂構。不後之以韋陟者。必不傳安石之盛名。袁彖才識。父覲知之。謝朓千金。父莊識之。蓋先生之孟昭之學。不惟翰林。孟昭之才。不止令長。故使之盡讀天下書。遍交天下士。若崔液以神駒譽兒。沈約以青箱名子。先生不屑屑也。舉孝廉而不使之急公車也。庭訓而讀等身之書。第進士而不使之僅工詞館也。庭訓而讀經濟之書。宰雄州。尹赤縣。而不使之僅通一邑之治譜也。庭訓而讀天下利弊之書。以故孟昭之學。精於馬鄭。孟昭之才。通於班揚。孟昭之文與詩也。富於韓杜。孟昭之以德與威惠治其邑也。趙廣漢之聰明。張京兆之儒雅。皆有之矣。孟昭讀書於清平山之日。良士弄田於花馬塍之時。當是時。鄭、楊、董、展、顧、陸、張、吳。讀其書。五經三史也。章、王、盧、駱、蘇、黃、米、蔡。讀其詩。評其書。三唐四宋也。踰年而孟昭入詞館。宰儀徵。良士縱遊秦晉。至京。而士夫藉藉述孟昭之治儀徵者。縛汚赭而禽縫裾。斬持縑而辨烏盜。感以孝經。賜之畫傳。邑無苦水。地成好溪。及良士遊其境。文章訓士。經術飭治。劉寬之處士諸生。文翁之學官祭酒。莫不敬以神君呼之。慈母。先日登宓賤之堂。入崔儻之室。知先生章氏宗會之法。延之庭誥之文。張融門律。穆崇家箴。樊重之子孫。若公家華歆之閨門。如朝典。胥在是也。而後知先生數十年之志。不憚孟昭之不爲儒林。不爲文苑。而欲孟昭之必爲賢良。必爲循吏也。蓋古有父隱而名盛。子仕而名不噪者。龐德公不仕而山民爲黃門。管幼安不仕而子藐爲郎中。宗少文不仕而子賓爲南郡。韋逍遙不

仕而世康爲荆督。先生之所廩廬也。必也。王祚家居而溥也。趨侍。陳省華家居而堯佐也。側立。則父子隱顯之盛名。先生當之矣。先生以一縣者百城之表。十道之率。陶侃之八州。荊州之十郡。同是治也。乘一丈車。賜三神劍。隱者爲四皓之功名。顯者爲三楊之事業。鐘鼎在家。竹帛在史。政事文章。先生之遠大。我孟昭者如此。宏農君年次於先生十二歲。昔者馮勤之母八十而與朝會。張齊賢之母八十而受手詔。顧雍迎母。朝臣畢臻。合肥迎母。將吏羅拜。使孟昭他日導母輿。而大常奏四部之樂。執母轡。而淄州迎數十里之郊。則先生期頤掀髯。所謂公著爲名相。而子揚其父美。敬夫爲大儒。而子彰其父功者。先生之述遵艱難。與福位名壽兩無憾歟。良士聞之。劉柳無稱於事業。姚宋不見於文章。今孟昭詩文集盛行大江南北。此章蘇州之焚香賦詩。而民不忍欺。白香山之家絃戶誦。而吏牘一清。視當日局促翰院。焚宮香而讀麗正文章。登落雁而攜驚人詩句者。庶幾乎西南夷之弓衣。皆梅都官詩。吐谷渾之牀頭。亦溫子昇集歟。畫鶴之記。遍於新羅。子雲之書。傳於百濟。吾願孟昭宏揚先生之遠大。不急以藝事爲三絕。而卽以勳名爲四夔也。孟昭性純孝。故江以南能文者。必以一文爲先生壽。同載青山。羞掩父德。移書太常。求顯父名。古之志也。今孟昭求增父秩。古之孫述也。乞擬母封。古之趙槩也。若良士之不文。亦思序先生梗概曰。此非歐陽氏畫錦之記。實趙清獻瑞安戲綵之堂也。

重脩靈鷲寺啓

人天何幸。中華留靈鷲之山。烟水無人。彌勒坐毗盧之閣。寺左先有毗盧一閣。因基占廟云。將興大法。以人傑者地靈。要作

道場。必財多者工聚。與迦葉建五層之屋。大石山穿。爲長者造祇樹之林。人牛金盡。至若盲人五百。託棲

樹而求家。窮子三千。投化城而覓宿。是非九百柱化天之殿。道衆難居。無一千年住法之人。佛燈易滅矣。

蘇州府治。良隅靈鷲寺者。蕭梁棟宇。天監利竿。地非花氏之城。名載摩陀之中。化龍影散。佛樹枝枯。以吳

宮花草之墟。留沙劫沈灰之屋。久已鹿皮爛盡。髮地無泥。雞足山封。龕門不禮者已。嘉慶三年有住僧僧

綱某某者。大牀尸坐。窟室淫居。陽脩梵網之經。陰搆摩登之室。私呼梵嫂。明犯燈光。亦師羅什。大吞御婦

之針。敢學文殊。竟擁同牀之女。半千年佛姨壞法。大可傷心。五百衆甄女失通。居然末劫。以致雷音天鼓。

神走伽藍。接手抱腰。冤呼佛眷。宰官瀦其故宮。桓因呵爲鬼住。幸而法無淨穢。地有衰興。不倒魔天之殿。

難開戰勝之堂。勿夷惡鳥之林。難種鳩羅之樹。茲有漏盡禪那天台大德某者。內脩白業。外覽元文。讀豐

干樓上之經。望天姥峯頭之月。草鞵踏遍。依普賢行願而來。拄杖擔存。託居士草庵而住。以乾隆年月寓

於蘇州也。鐵圍海裏。小結維摩手版之居。蟻子宮中。大書彌勒遮那之字。彭居士爲覓寺左小菴。署曰瓦盧。而且開道場以

甘露。表淨刹以金門。止觀雙脩。六時禪定。機緣四衆。五體和南。加以須達長貧。散陀不富。廉留賈客之金。

儉餉貧婆之米。示病不肥。噓麻長瘦。如斯人者。或亦梵門之龍象。釋氏之笙簧者歟。蘇州百族蠶居。五民

魚聚。笙歌七里。色宮欲界之天。士女千年。極樂彌陀之國。亦有鞞蓋大富象馬施金。亦有糞窟奇貧。巽甄

供米。或洗僧浴。佛溫室求男。或敬壇懸鈴。金錢祝子。且或香燒象藏。花獻波羅。媚佛燃燈。懸幡續命。如是小緣。咸希微福。至於蓮宮既廢。大利乃荒。鹿苑盡爲屠場。蘇州北寺今爲殺人場。如來沒後八十年。祇園亦改爲殺人場。雞園改爲茶市。蘇之最大刹也。今爲茶場。穢雜之地。地雄九縣。竟乏叢林。寺曰四禪。吳中叢林最古者。南禪。北禪。東西禪也。今盡廢。不開鐘版。以致行腳打包之衆。過午無餐。螺螄蚌蛤之僧。沿街索睡。豈徒分衣迦棄。借宿桑中。托鉢阿難。誤投媼室。俗不施檀。地無分衛。良可歎也。近惟長元吳三方僧衆。門稱應付。未習四檀八教之儀。官有僧綱。不明十誦五分之律。或家居火宅。神通則唾婦藏壺。或身處魔宮。法力則燒豬喫酒。其或搖鈴鼓鉢。日諷彌陀般若之經。讚唄揚聲。夜譚餖口瑜伽之印。甚至驢唇鎖鐵。狗脚關釘。身燒釋伽之鐙。香爇藥王之臂。而且獼猴作帝。亦坐師牀。狐狸偷涎。竟操塵尾。自號大僧。難爲長老。此輩魔民。勿化。必有因緣。鬼趣難降。須求賢聖。所以虎山頑石。生公到而低頭。天台山神。智者來而匿迹。聖教如燈。邪宗似海。無關末法。是仗導師。此易俗移風。宰官居士之所望於禪德者也。某官等。以十一月十有三日。送師主席。山門離垢。棟宇發光。槃特掃塵。金剛淨糞。目覩蜂房九曲。尙是汚宮。蟻戶百門。都非淨土。緣是摧枯拉朽。芟其棲囊。正位辨方。夷其堂坵。以爲宏茲蘭若。必建廣堂。大此招提。必興傑閣。夫禪堂嚴密。乃結冬選佛之場。講堂寬間。乃解夏談經之地。瞿利帝三千食指。則齋堂必有法。同應供之廚。善知識五十來參。則客堂必須八萬四千之座。乃若圓通示應。開闡思一法之門。則大悲閣在所建也。唐梵同函。貯滿半三乘之典。則藏經閣在所興也。如是棟梁。皆資土木。

夫化人宮宇。匪偃師幻術可成。天釋殿堂。豈毗首安心能造。須彌山青鴛一墅。亦用人功。阿育王梵宇千間。全憑國富。則可知羯磨大斧。勢不斲龍宮霜霰爲樓。舍利長繩。必不界蜃氣青紅爲屋。某等因緣作雨。解脫爲風。誦福田一卷之經。結香火萬年之社。仗此身心布施。同撐般若之船。從茲利益人天。共種菩提之樹。讀洛陽伽藍之記。草蔓煙荒。撰北天精舍之圖。高竿大利。用布長牋。敢申小啓。署多寶如來之號。大士和南。書好施太子之名。龍王合掌。

爲師禹門刺史送琴師張燮堂道士入東磊山序

入懸壺之山者。聽靈鳥以爲箭詔。說南斗之經者。坐玉牀而踞洞穴。自輔漢著書而後。鶴鳴山深。想道陵冲舉以來。雲臺峯近。道陵與夫人雍氏。於雲臺山白日昇仙。見仙鑿。餐霞辟粒。代乏松喬。煮石蒸丹。世無彭朔。則何羨乎陟山采藥。泛海求師者之勤。勤問津也。予泄海州之明年。尸梟徒懲獷俗。民稍安矣。而雲臺懸海外。枝峯蔓壑。側碧斜青。東磊者。又僻於清風之左麓。延福之下方。其羽流或太古衣冠。或空山鍾鼓。分門則別其子孫。析地則私其農畝。紫宮佇月。掌玉殿而道紀無人。茅齋撈雲。守化樂而洞天無主。半千年末法之道場。非五百衆總持之正法也。爰選名流。與司香火。非葛仙公名聞東海。抱朴難居。非費長房朽索懸心。山深莫住。而金陵隱仙庵主張燮堂者。清淨爲師。太和爲友。委駕於無欲。指歸於無爲。其安心若操縵。其學道若彈琴。予使以蔡氏之五弄。入成連之三山。則東磊者。安知非他日華陽之室。金壇之庭乎。夫鼈靈鑿硤。力士

開山。水以龍靈。地由人傑。彈十二引水。仙之操。安八十調。魚龍之變。其佐我宓堂。希聲者。於吏治不無小補歟。琴不期於濫脇。號鐘。曲不必乎陽春。白雪。以和平爲寬猛之音。以宮角爲相悅之樂。庶幾葛天之八闋。義樂之扶來乎。至於夏竦仙骨。而道流惜其墮落。李泌仙樂。而世俗潑以葑藿。僕亦將蠲膏剔髓。浣垢滌塵。從先生於綠水青山。爲風月主矣。蕉堅之體。而慕龍鳳之年。朝菌之肥。而求積朔之久。知先生亦未必尹林之冲舉。茅君之飛升耳。釋名曰。仙。遷也。遷入山也。列子曰。岱輿員嶠之山。沈於大海。則先生猶龍伯國之一人。靈冥五百歲之春秋乎。王平甫爲靈芝仙官。石曼卿爲芙蓉城主。僕主是州。亦將

原闕

